

本朝分省人物考

人物考卷之一百十五目錄

貴州全省

易楚誠

王訓

詹英

張諫

秦顥

申祐

楊瑄

安康

周瑛

易貴

李濬

趙侃

李珉

徐節

孟震

楊稽

汪大章

越昇

陳文學

范府

趙遠

沈尚經

侯位

王木

田秋

盛全

華剛

湯暉

楊振文

顧堅

許奇

趙維垣

李渭

蔣宗魯

敖宗慶

李佑

劉秉仁

陳珊

孫應鰲

馬廷錫

柳之文

石邦憲

李梅

陳尚象

楊如臯

吳綽

許鑑

本朝京省人物考卷之一百十五

南直督學御史西浙過庭訓纂集

門人蘇松備兵副使南郡熊 膏叅閱

男 過銘盤

過銘孟

過銘簠

寧國府學生員嚴弘志全訂正

貴州全省

易楚誠

易楚誠吉水人洪武間父遊貴陽歲久老且病楚誠

待養不倦父嘗盛夏思冰楚誠泣天致懇已而大雨  
電又嘗病瘍醫欲得兔髓和藥楚誠求之野偶有羣  
鷹攫一狡兔爭食之持歸付醫疾旋瘥有司欲上其  
事固辭曰此非吾誠所感偶相遇耳不願以是得名  
事遂寢

王訓

王訓貴州衛人博學知兵工詩文年十八上保邊政  
要八策宣廟嘉納之宣德乙卯中鄉試正德間以  
都督吳亮薦授儒學訓導教法嚴整文化聿興多士  
景化郡學制度草創訓與副使李濟極力營建正統

十三年麓川思任發叛尚書王驥總帥討之辟訓佐  
助十四年苗佬攻圍新添平越等衛尚書侯璡辟訓  
贊畫不閱月圍解論功陞教授成化二十三年御史  
臺瓜生並蒂有司以聞訓爲嘉瓜頌獻之當道屢薦  
皆引避不就晚以子貴封武略將軍副千戶卒年八  
十有寓菴文集三十卷并孫子註解訓又有讀書臺  
在城北二里許白巖山半歸田時所築臺下疊石作  
院鑿池雜植花卉有琴案棋枰皆假石爲之常與客  
遊玩於此以愉適其志焉

詹英

詹英字秀實玉山人成籍於貴正統戊午鄉舉授四川會川衛訓導時滇有麓川之役會川與滇隣而英祖居在貴乃兵所從入之孔道也英上疏言邊務十三事悉行之是時中官王振柄于內王靖遠領東南兵十五萬轉餉半天下中瑞子弟因緣爲利英上疏論靖遠貪功窮兵老師費財海夷金寶盡走京師閹宦乳童立功西域疏奏上大異之詔卽往叅其軍英恐事屬掣肘非便自詣闕以不可狀辭公卿聞其至皆欲識其面或納交或招致爲重客或欲薦以臺職處之會己巳之變歸于會川滿考轉雲南河西教

諭雖去蜀猶憂其患疏薦可撫蜀者尙郎張固  
上  
可之蜀賴以安當是之時英以疎遠小臣奮不顧身  
言天下事天子聽而用之大臣不沮抑之而又欲  
薦之是真可謂不諱之朝矣英所著有止菴集今逸  
不存

張諫

張諫字孟弼赤水衛人少有志節脫父伯安于行伍  
不憚險遠嘗從劉長史仲珩學於蜀時劉忠愍廷振  
奉使至蜀諫日與講論二公甚器之宣德乙卯中雲  
南鄉試第二明年至燕卒業忠愍之門正統己未成

進士貴州登進士自諫始選授行人未幾丁母憂哀  
毀骨立廬墓三年致羣烏芝草之感起服拜御史往  
督福建銀課時當寇盜殘毀後民物凋敝餘孽間作  
乃親帥土兵撫捕賊遂遠竄父卒復廬墓三年芝再  
產墓傍歷官河南副使順天府尹以直言謫守萊州  
尋召爲太僕卿卒於官賜葬祭

秦顥

秦顥字士昂宣慰司人正統壬戌進士拜行人遷禮  
部員外郎天順初奉使滇粵咨民隱歸疏於朝上  
多採納歷官雲南左叅政鐵索箐賊起攻殺武昌馬

龍尋甸顚襲擒之會御史審決有死囚九十人皆執  
案不辨忽省堂萬鳥飛集彈揮不散顚疑有冤也詳  
鞫之平反者三十九人偕三司巡金齒騰衙舟經潞  
江風濤大作舟中悉驚怖顚獨正色賦詩有云若載  
贓私並土物任教沉向潞江中頃之風寧舟濟人皆  
謂其忠誠所格卒於官

申 祐

申祐字天錫婺川縣人常從其父之田道逢虎父入  
虎口祐挺身持杖尾擊之虎逸父得免正統辛酉中  
雲南鄉試入國學肄業時祭酒李時勉以言事忤

吉下獄荷校國學門祐倡六館諸生伏闕申救且願代其死上爲之霽威尋登乙丑進士拜四川道御史立朝忠讜多所補益諸御史聚議祐折衷其論咸中竊繁衆皆推服出按廬鳳所至輒進諸生講論經史疑義已已英廟北狩以御史扈從至土木死之嘉靖十年郭御史弘化移檄祠焉

楊瑄

楊瑄土人也其先曰忠順者元總管府同知勝國末大明兵南下忠順詣軍門送款洪武五年以忠順爲鎮遠州同知傳至瑄革州陞鎮遠府通判瑄軀體長

大有膽略正統末苗叛景泰元年兵部尚書靖遠伯王驥同貴州總兵官毛福壽駐劄鎮遠檄瑄部領縣司民兵協同官軍征邛水十四寨苗時苗據紋羅山拒戰瑄以所部兵深入險阻連破敵斬獲甚衆二年重安苗與官軍戰敗退香爐山參贊軍務右副都御史王來督諸軍進討瑄復以所部兵攻破榜蠻等寨陞瑄從五品俸七年平蠻將軍南和伯方英檄瑄部領民兵會同官軍征洪江大小坪諸苗瑄進江頭屢戰斬獲首級甚衆天順七年邛水以南諸苗復叛貴州總兵李安湖廣總兵李震合軍進討瑄攻楠洞坪

有功成化二年茅坪之戰瑄死之茅坪賊巢也時參將吳經會瑄以所部兵會同官軍爲一哨進至江口卒遇賊未及陣戰死事聞贈正奉議大夫本府同知仍錄子入監

安 康

安康字汝錫思南人總角時讀書青鸞溪常拾腐薪繼晷景泰癸酉中雲南鄉試如京師從太史商素菴遊除南兵部司務歷工部都水郎中督造內用器皿減積料價至七千緡弘治初彗星見應詔陳言大要息興作裁冗員詰奸慝以彌天變上納之弘治壬

子出守澂江修政惟謹精誠步禱六月雨雪夷人自  
僰擁萬衆爲寇郡民苦之康單騎入穴示 朝廷威  
德夷苗悉平南人祠祀之致政歸裝僅衣衾數事放  
情林壑絕跡公庭年七十有七卒入思石二鄉賢有  
青鸞溪集行於世

周瑛

周瑛字廷潤興隆衛人其先自臨川從戎征南留守  
于茲大父以武功授千戶瑛補衛庠生篤志行學遠  
從師於蜀之瀘州比再期歸登景泰甲戌進士由刑  
部郎出知臨安衡州二郡遷行太僕卿廣西右布政

使駁歷中外文而引年以歸優游林泉間多吟咏嘗  
出貲修衛學所著有興龍衛志二卷草亭存稿若干  
卷

易 貴

易貴字天爵宣慰司籍吉水人景泰甲戌進士廷試  
二甲第二貴幼聰悟出羣長通朗剛正淹貫載籍宦  
轍所至崇學校恤民隱遇事明而能斷不怵于勢利  
有古循良風歷官辰州府知府創禮儀治樂器士始  
知古道歸田杜門校書十餘年卒所著有竹泉文集  
十五卷詩經直指十五卷

李 濬

李濬思南永德司人由歲貢任臨武主簿天順庚辰  
峒苗以萬衆入寇時濬率衆保舜峰寨以拒之賊環  
寨而攻者三晝夜蓋寨爲均義故壘也四壁巖然隱  
隱見陴堞濬出死力率先壯勇驅石曳柴以助聲靈  
卒能完師無害寇退樹柵列堡衆若部落然冬十二  
月苗人再入寇以報舜峯之役而釋憾於濬時已有  
土堞可依民旣經戰守諸凡攻禦之具亦粗備矣城  
中煮毒藥膠矢鏃以射人無不立死者圍數日賊中  
藥死者半竟無所得而去八年又合衆大舉數且二

萬計連寇城下者再不克轉攻桂陽城陷之時則知縣陳鎰已至而將衆保城運筭出奇則濬之力也陞山西蔚州同知

趙侃

趙侃字至剛普定衛人景泰庚午雲南鄉試第二天順甲申進士授吏科給事中陞都給事中時政得失軍民利害屢形奏牘有憂恤邊軍疏陳時政八事疏皆經濟急務大臣有不爲公論所愜及朝覲開報不實進退不公者舉彈無所避權倖憚之又陳言禁革宿弊任賢養民彌災禦亂振舉公道悉中時弊上

皆嘉納率見舉行適清理軍職誥命缺右通政冢宰  
意屬選郎黃孔昭而以侃名陪點 上特越次點用  
輿議駭其有不次之擢而侃處之泊然卒於官賜諭  
祭祀鄉賢子穀馬龍州知州

李 琢

李 琢字美中衛輝淇縣人祖仲宜洪武間授御史不  
阿權要謫戍烏撒遂占籍焉成化壬辰琢登進士授  
寧國知縣寧國官田租重民田多爲勢豪兼併琢損  
益官民田而稅課以平公私稱便有白兔之瑞辛丑  
徵拜南道御史巡視上江捕僧寇千餘同巡撫王恕

交劾中官王臣等暴橫蘇松再同御史徐鏞交劾中  
官汪直等羅織縉紳臣傳首江南中外稱快他如余  
尚書用兵失利中官梁芳等引用妖邪日勤章奏稱  
名御史乙巳 命清戎四川疏奏貴州站舖邊軍損  
擡遞送之苦 上命站軍月支糧五斗舖軍月支糧  
三斗舖站之糧自此始尋陞四川僉事子銑中弘治  
己酉鄉試

徐節

徐節字時中其先壽昌人戊籍貴州衛父資當正統  
己巳湖貴寇起清平道梗守臣請兵征討御史黃公

鎬聞資有才略辟置左右是年秋七月黃公巡邊至  
羊場河猝與賊遇將爲所掩資奮挺直前厲聲叱曰  
螻蟻羣孽敢害朝廷憲臣耶我分死之明年此際  
當殲爾醜類遂遇害翼日賊見之面如生遂遁去黃  
公幸免明年秋賊果平適符資臨終語鄉人因名其  
墓爲忠節岡節其仲子也幼習易於御史陳鑑大奇  
之遺以易義成化壬辰舉進士授河南內鄉知縣治  
行稱最被徵吏民遮道悲慟衣履爲之分裂擢御史  
三上章數錦衣指揮牛循罪惡屢劾相臣萬安等風  
裁凜然自太平知府擢雲南叅政連破梁山竹箐米

魯諸寇錄功食正二品俸遷右副都御史巡撫山西  
以廉正忤劉瑾瑾矯制削秩罷歸瑾誅奉詔復職致  
仕節居官廉謹不忍擾民在太平荒政全活甚衆又  
餉二驢于官廨鄉人過郡以二驢送出境驛遞皆不  
與知比老自擬淵明生作挽歌行狀以示其門人汪  
沐訣別如平時浹旬而逝年八十有六嘉靖元年嘗  
纂修 武廟實錄有司以其事聞五年賜諭祭所著  
有蟬噪等集

孟 震

孟震貴州宣慰司人成化庚子鄉舉正德間任雲南

府教授修潔簡默在任九年未嘗妄言笑三日一課  
諸生令屬文違者輒笞責之諸生於父兄鄉黨稍有  
違犯無弗知皆恐恐守業不敢嬉遊郡中至今言教  
規必曰孟師兩典文衡六任教職皆有賢聲士大夫  
稱六學先生

楊 稽

楊稽字希祥宜慰司人弘治戊午鄉舉性至孝母嬰  
心疾每一發輒顛往往如不克生稽號泣以隨露禱  
于神求以身代母卒哀毀骨立杖而後興竭力營喪  
葬具幾于毀性守服三年如一日甫舉於鄉父已垂

白禡眷戀不忍離左右人強之仕不應終養十餘年  
父卒始投牒授新寧縣值流賊破殘之餘多方招撫  
安集士民懷德解組日亡以治裝家居訓子不入公  
門年八十餘卒子文炳府照磨文煥知縣孫其寧以  
寧俱府通判之寧府同知玄孫世華舉人人以爲孝  
子之報云

汪大章

汪大章普定衛人弘治己未進士幼稱奇童年二十  
登第歷官叅政不附逆瑾所經宦處卓有聲績咸祠  
祀之

越昇

越昇宣慰司人宣德間以經明行修召將授館佐職會四川播州宣慰司求經師以化夷俗遂授昇播州學司訓尋卒于播三世孫英字德充剛方正直無戲言惰行從叔宦湖南家口流落英間關盡歸之年已二十八發憤讀書七年以弘治甲子中雲南鄉試任瀘州知州好善嫉惡守正不阿棄官歸行李蕭然家食三十年絕跡公門闢蔬圃于西關門外因號西園日靜坐其中作詩文自娛觀書課子明農詩卉諸無所嗜好卒年八十一

陳文學

陳文學字宗魯前衛人少事陽明先生弘治丙子鄉舉知耀州三年調簡不果赴杜門養疴一切世故罔預稍閒卽開卷苦誦卷則覓紙臨古法帖以自娛賓或至下榻清話論文談詩博奕嘯歌隨意所適至忘晷刻雖嗇於治具亦未嘗不歡洽也自耀歸日者言歲將不利乃自作五栗先生誌五栗者其別號也後二十餘年始疾有客問疾談笑慰籍曰別矣善自愛客去危坐而逝所著有陳耀州全集

范府

范府字季修貴州官籍湖廣宜城人正德丁卯鄉舉授巴縣學諭大賊藍鄢起都御史見素林公召置戎幕一切章奏口授代草撫勦機宜預議未幾丁艱去補遂寧令遂寧東去縣治遠民多不馴府爲諭善良剪強梗倡亂者帖然增修石城不費財不妨農而功就緒至今屹然陞雅州知州蘆山縣隣天全招討司先是招討使高文林及其孫高維恩等占據蘆山頻年劫殺朝命討之遊擊將軍曹某與戰不利兵屯雅州大爲民害府乃請於當道散之身入招討司與副招討楊世仁約兵夾攻文林夜奔縊死林莽繼恩逃

誘六番作亂府行間設伏卒擒繼恩復爲蘆山修城  
其壯固亦如遂寧陞重慶府同知未幾致仕歸城外  
二里許有唐山洞與鄉大夫耆彥能詩文者約爲溪  
山詩社久而成集因名唐山倡和卒所著有唐山楚  
辭樂府詩集藏於家

趙遠

趙遠永寧司人正德庚午鄉舉任叙州府通判署富  
順天性儉約甘清苦官舍一僕自隨不攜妻子節省  
財力鼓舞生徒邑人爲立遺愛碑歷官桂林同知

沈尚經

沈尚經普安州人正德庚午鄉舉歷官廣州府同知才識明敏聽訟每得隱情而操守清白督學魏校毀淫祠寺觀勢豪多匿田土累至興訟尚經履畝清查均其徭役輿情愿服擢刑部員外郎

侯位

侯位字世卿平溪衛籍平溪故無學位寄學思州府又爲思州人正德辛未進士初仕無錫縣歷兵部郎山東叅議南京光祿寺卿遷右副都御史巡撫應天其撫應天也會太夫人夏氏年登百歲乃自陳乞終養吏部侍郎霍韜議曰古者聖帝明王之御天下也

巡狩至於方岳詢百年者就見之敬老也天下有百年之老太和元氣之徵也古帝王所以申敬也漢文帝三代以後盛德之主不時使人存問長老八十以上以賜米肉九十以上賜絮帛亦所以敬老也老者敬焉所以勸天下之孝也 皇上登極屢頒恩詔凡高年民八十以上俱令郡縣有司給賜米肉布帛有差凡以風天下而敦化基也今都御史侯位母夏氏壽躋百齡尤世希有是皆我國家敦大博厚之氣脉薰蒸衍溢鍾爲上壽天下生靈命脉悠久之祥夏氏孕和協瑞產自全楚寔我 皇上龍飛之地又 聖

德造命無疆之祥敬老尚年古今通義都御史侯位  
自任巡撫凡財賦之稽查百姓之存恤利弊之興革  
竭力効忠地方甚有賴焉今拘於例難准侍親伏望

皇上勅令本官照舊供職仍行湖廣撫按有司申  
敬老之制於夏氏加酒肉粟帛之惠則厚其親其子  
莫不勸移孝爲忠位將感激圖報愈無窮矣 上曰

侯位不准侍養夏氏着有司給絹米一時縉紳豔以  
爲榮嘉靖二十五年太夫人百二歲卒位請祭葬廬  
墓所懸車十餘年杜門寡交卽至戚弗與覲家在平  
溪徙辰州子孫仍居平溪平溪建學實自位始士至

今德之

王木

王木字子升清平衛人父漳貢入太學授清苑令有惠政時劉瑾奉使至漳以不折節忤瑾廷斥之遂棄官歸行李蕭然木生而好學中正德癸酉鄉試登乙榜授隨州學正撫按交薦召爲南湖廣道御史彈劾不避權貴歲壬午大比士近臣主試弗公物議騰沸木糾之勳臣庄戶爲民害一繩以法貴戚歛手江南苦惱爲祟民無以自振疏出公帑賑濟多所全活海寇董効等倡亂江洋木會兵勦之拜白金文綺之賜

入薦大學士楊公一清尚書王公守仁可大任時服  
其知人出爲雲南僉事整飭迤西兵備精覈羣吏獎  
廉黜貪而賦性梗直初所論列權貴人共排陷之數  
年不調遂拂衣歸歸而嘯傲山林容與竹素晏如也  
先世室廬盡讓諸弟暇日課子若孫子學祖歲薦廸  
登進士府同知煉舉人知縣烺歲薦敎諭孫男培墀  
塾曾孫瑛俱舉人所著有東巡集晴溪詩集奏稿藏  
於家

田秋

田秋字汝力曾祖永富洪武初遊學思南因家焉正

德甲戌登進士歷官禮科左給事中劉瑾初誅璫焰猶熾秋奉勅清查御馬等監裁縮至七萬夫食至七萬石查光祿大常庖厨力役又裁至二千四百餘夫因陳謹飼秣慎稽考十二事斟酌未盡三事皆塞冗食之孔扼中貴之咽者都御史汪鋐奏壇郊外凡墳墓悉令遷平以擴墳址疏下涕泣載道秋疏略曰都城村落萬塚鱗次懷土重遷夫人常情而經發朽骨尤傷孝子本意欲以致天地之享反以傷天地之和疏入忤旨而澤及枯骨矣思南僻處一隅流移彌聚曾播蠶春秋請設兵備貴州往貴士赴試雲南跋涉

甚艱請另立選闈以寬制額疏入從之  
肅皇修飭  
山陵豫建壽宮大臣首進開礦之策極陳其不可者  
三後試行之都御史黨以平解礦石六十斤工部煎  
銀正十五金而解官王愷稱掘夫百名防軍百名燈  
油搥鑿廠房餉廩費不下百金是所出浮於所入而  
礦所地名荆子谷密邇邊牆又易起釁復抗疏乞罷  
歷陞廣東右布政上疏請告病革草訓子略正衣冠  
而化所著有西麓奏議若干卷

盛全

盛全普安衛戍卒家貧而孝母恒疾齋戒三載弘治

己酉三月母病革不能爲藥度勢不可活詣城南龍  
王廟齋沐秉虔仰天禱焉質明剗腹出其肝剗之死  
而復蘇持歸與妻和羹以食其母衆聞奔至廟血跡  
在地壁書盛全爲母四字恐死患及鄉人也有司憫  
其孝給之醫藥七日而愈母疾亦瘳正德丁丑卒萬  
田林廷弼賦普安盛孝子歌廷弼林見素先生也

華剛

華剛都勻衛人監生正德間以杭州府判陞彌勒知  
州明察強毅有爲有守十八寨賊首阿勿等聞名喪  
膽輸納逋稅朞月間法令大行惜以狷介見忌於郡

卒于官州父老至今頌之

湯 哉

湯嘉字伯元貴陽人年十四失恃繼母韓性嚴重諸子弗敢近弟邦鼎皆亡去惟嘉委曲承事卒以孝致其慈正德戊辰王伯安先生謫龍場嘉師事之嘉靖辛巳成進士歷官南戶部郎出守潮州潮劇郡剖決如流至廣濟橋稅開元寺租毫無所濫縉紳請托不少徇瀆之再三則糊刺堂壁以愧絕之由此銜恨刺骨甫三月改鞏昌便道歸省其在任思親有腸斷九迴情獨苦仕逾十載養全貧乏向居無何中飛語歸

莫年以詩自娛與陳栗山唱和爲多所著有逸老閒錄續錄若干卷嘑性孝友二弟出亡從滇歸獲邦於普城爲擇室助貲援例歷官登仕佐郎惟求鼎不得每以爲悲卒年八十一子克俊新興州知州孫師頊今爲順天府通判師黃祿豐知縣

楊振文

楊振文宣慰司人嘉靖壬午鄉舉守達州政平易不事苛刻歲大旱又多虎責躬禱神雨隨注一日虎斃者三民德之終臨洮府同知孫秉鉞雲南副使秉鐸

同知起瀛舉人

顧堅

顧堅字天厚其先無錫人戍籍貴州嘉靖壬午舉人由弋陽訓導知樂平縣事樂平素悍頑前令悉敗去堅獨飲怨任謗不滓於賄樂平大治選南道御史改北按甘肅邊境輯寧出爲雲南僉事山西左叅議以南人不習水土疏乞休致仕晉人泣送不忍去是時山西御史黃公毗檄二司曰顧少叅見道分明蒞官勤慎作譽髦於振鐸並駕蘇湖敷膏澤於鳴琴齊聲召杜立臺爲朝端之鳴鳳分臬則滇南之赤麟山右旬宣萬井沐紫薇之露北窓幽雅角巾踵栗里之風

豈特知止於功成蓋已先登於道岸某不能繫馬維  
駒有孤宿志親擊摯轅臥轍益驗去思其見重如此  
歸年甫艾杜門謝事精於醫理凡疾莫能治者輒投  
以藥隨手取効活人不可勝數至於陰陽星命百家  
靡弗精透鄉人有疑咸就正焉應若洪鐘纖悉不爽  
卒年八十一

許奇

許奇字文正貴州衛官籍嘉靖辛卯鄉舉授巨津知  
州巨津夷地故無署奇借寓于滇寇檄交馳道路以  
次蕩平若太和昆明鄧川趙姚皆褰帷之地大著廉

舉五載憂去復補祿勸州四載遷順慶同知性謹厚  
尤大有執持若事關利害持之更急會有巨寇爲民  
害者業已就擒廣行賄囑爲解監司欲釋之力陳不  
可遂大忤監司又鹽課無徵者院議均攤於糧奇建  
白以爲課生於井糧生於田齊民無業於井而使代  
鹽是甲疽而乙之困也又大忤直指免官歸以伯子  
一德貴封御史一德辛未進士御史副使仲崇德知  
縣季裕德府同知

趙維垣

趙維垣字師德永寧衛人嘉靖壬辰進士改庶吉士

授刑部主事以詿誤下獄得釋謫大名維垣長詩歌  
善樂府在大名著攻玉集自爲序歷官雲南提學副  
憲福建左布政使永寧以芒部之亂迤西守備邵鑑  
請設叅將叅將劉鐸建府伐石題名而維垣爲之記  
人咸以爲名言著述甚多今多逸惟攻玉集存於家

李渭

李渭字湜之思南府人生有異質十五病肺屏居小  
樓溽暑散髮箕踞父中憲公富以無不敬飭之卽奉  
而書諸牖目攝以資檢束第覺妄念叢起中憲又以  
思無邪飭之又奉而書諸牖久之妄念漸除恍惚似

有得於是專求本心未與人接自問曰如何是本心  
旣與人接又自問曰本心是如何嘉靖甲午舉於鄉  
蕭然布素計偕以一僕自隨讀孟子伊尹耕莘章則  
曰堯舜居民事業自一介不取始交際豈可不謹癸  
卯蔣公信視學貴州渭謁之因陳樓上樓下光景蔣  
公曰樓上是假樓下與朋友譚笑却真至一介不妄  
取蔣公曰此猶然樓上意思在硜硜然小人哉渭愧  
甚以爲學十四五年只成得一個硜硜小人不覺面  
赤背汗淋淋也由華陽知縣和州知州擢高州府同  
知至則謁湛甘泉先生於小嶧峒中嘗宿廉州公署

夢三蛇遶身亟揮杖蛇乃走詰朝合浦吏以美珠進  
化州吳川吏以兼金進皆叱拒之笑曰三蛇夢破矣  
金珠非寶固吾人蛇蝎哉擢應天治中南戶員外郎  
知韶州府先是韶有二源之役崔苻之警未殄渭集  
諸寮屬諭之曰夫子告康子不欲二字千古弭盜張  
本儻多欲則身爲溝壑竭民膏脂不足以填之百姓  
安得不盜弭山中盜易弭心中盜難敢忘自責聞者  
悚息入覲過麻城從耿楚侗先生登天臺楚侗示八  
語近道之資載道之器求道之志見道之眼體道之  
基任道之力弘道之量達道之才八者闕一不可對

曰渭於人者獨愧見道眼未醒耳鑽必爲聖人四字  
印而布之海內嘗曰孔子母意孟子不學不慮程子  
不著纖毫人力皆是不安排知母意脉路卽日夜千  
思萬索亦是母意知無纖毫人力脉路卽人一已百  
人十已千如此用力實無纖毫人力學是學此不學  
慮是慮此不慮知得不學不慮脉路任人只管學只  
管慮都是不學不慮擢滇左叅政近溪羅公爲屯田  
使渭至與之合併精神學益進門人歌青山綠樹詩  
因論天理人欲浮雲人間作雨天上常清常明狂風  
江中作浪流水不增不減知得常清常明不增不減

方是學問以明月青山綠樹爲天理只是頻復又曰  
無不知愛無不知敬兩個無不知是天地靈竅吾人  
通天地民物死生皆是物本體原無間斷學者不可  
在起滅上做工夫任他千功萬行終做不成如樹無  
根縱日栽培灌漑終成枯槁予昔日工夫亦有起滅  
被近溪大喝通身汗浹從出這身汗自是欲罷不能  
自言已於此學入白下時覺與官和州時不同登天  
臺時又覺與白下時不同與近溪遊月巖又覺與前  
不同所著先行錄答問毋意篇合大學中庸易問雜  
著詩文統十卷又著家乘十二卷藏於家大儒治規

三卷行於世

蔣宗魯

蔣宗魯字道父普安衛人母羅夢虹飲井而生因號虹泉嘉靖丁酉雲貴分試遂中式放榜之辰黃龍見霄漢間其光如電下徹於地巡撫汪公曰此科目之光聖世之瑞也諸士當有應者明年成進士授濬令濬故畿輔劇邑徭最難均乃夙戒白城隍神曰審編民命攸繫魯若私神勿俾還家里老吏書等若私神勿俾保有妻子遂約法定則盈縮高下一準於田產有里長趙某者戶本上上誣爲上中越數日其妻抱

三娶踵門泣曰妾夫欺公神暴亡之矣夜聞鐵索聲  
請乞姑舊保二孩及遺業邑人稱神君焉遷戶部主  
事監昌平儲題其座右曰入母重民膏民脂出母輕  
軍衣軍食比守成都朔望誓於神曰貪婪害民天必  
譴之忠君愛民天必佑之有利卽興有弊卽革凡我  
僚屬相與勉之是時滇江逆酋那鑑殺侄倡亂誘方  
伯徐公樾殺之士卒死者萬計天子震怒簡魯備  
兵臨元至滇喟然曰酉本家難而貽禍於國業已歲  
我方面大臣損我威重而復窮於兵禍難卒弭乃悉  
解諸軍若無意然者獨遣指揮汪輔以署印往密授

方略卒不遺一矢那鑑自殺餘黨就縛歷河南按察使時伊府肆虐人莫敢指魯首舉其惡竟寘於法而出兩河民於水火滇川土司諸部有阿堂弑主自立患蔓三省晉魯安都御史撫滇魯曰是猶那鑑也兵不在多貴謀重入境乃陽掣各調兵而陰以土兵敗賊於野馬川賊氣阻然後以安萬銓正兵臨之設奇置伏於是阿堂授首俘其子阿哲不數月而平魯撫滇持風裁尚大體與分宜忤乃告老所著有治濬款議齊梁監兌錄吳關奏議牧政事宜撫臺疏草并詩文集藏之家

敖宗慶

敖宗慶字汝承一字應昌思南府籍少讀書中和山與同社龔仲霄費恒稱三友云三人皆後先登仕籍嘉靖戊戌宗慶成進士授行人久之擢膳部郎分治鐵冶鐵冶役夫殊困楚憐之寒給之衣病療之藥所全活甚多遵化故無井泉軍士酷夏多病渴令多時梨至今賴之草場利入故饒卽以充匠役鑄金灼瓦之費而毫無所淄陟蜀憲副備兵松藩松藩僻在西陲廩餉獨倍轉輸者輒乾沒其間爲報藩司得親給便又故事賞番歲計不下數萬緡出自公帑茶榷亦

不下數萬緡以充賞貲鄰鄰然如寒潭澄江徹底無所滓穢其操介如此晉廣西廉憲會戌卒調備倭其往來桂林間咸虎而戟雞犬靡寧當事輒以盜捕治之曰戌卒未應募先皆羣醜耳旣爲酋長招來之所趨惟利况酋長又半匿其餉而半給之奈何不掠也一旦卒事歸欲責以秋毫無犯難庸詎盡死數百人者不報揭凡三上臺使竟不報乃作而言曰殺人媚人吾不爲也吾寧以一官博數百人爭之益力竟出之癸亥晉副都御史巡撫雲南鐵鎖箐頻年干櫓遠近騷動一一指授石畫卒奏奇功以病眩屢請歸弗

予竟以閑住放歸

李佑

李佑字吉甫清平衛人嘉靖丁未進士授南大理評事陞寺正丁巳春三殿災改繕部往董川貴大木深入嵐瘴不辭險阻一時報發獨多而又不似他採木使者侵掠商賈第令有司出納終其役皭然無滓鉅工攸濟於是名愈崇重遷江西副使備南贛兵事南贛者盜藪也自陽明經略後垂數十年萌蘖滋長歲辛酉殺汪憲副猖狂彌甚佑蒞事浹辰卽單車入岑岡三巢譬曉李文彪謝允樟諸劇賊禍福各歛束聽

命立定南縣控制諸巢無幾何廣東賊煽亂廷議請復設撫臣以佑在南贛有大勞遂開府其地當百務創造無所承襲綜理周密號令嚴明省汰冗費雖羽檄紛馳餽餉絡繹未嘗增歲額外繕兵甲造戰艦修城郭練士卒圖靖奸宄如海賊林道乾山寇張韶南等皆次第殄除所向無不摧克終歲間捷書相繼十餘上受金幣之賜者十有三賜璽書諭勞竟以病歸未幾卒所著有南法寺駁稿六卷撫粵疏草八卷詩文四卷

劉秉仁

劉秉仁字子元貴陽人父節齋爲國子學錄而平湖  
陸翁者亦在六館仁隨父遊長安與陸公子吏部尚  
書光祖皆總角會林祭酒講於堂聞壁後有人聲則  
仁與光祖在焉召至試題大驚賞謂兩公曰二子並  
他日公輔器其識之嘉靖丁未成進士補江西德興  
縣知縣以廉平愷悌稱有反風滅火之異陞工部都  
水司主事榷稅杭州秋毫靡湧會三殿災改營繕郎  
中調度將作議者謂宜括天下藩司帑金仁以貴州  
鎮筭之役時未底定軍興交馳力疏不可詔貴州獨  
母以金進民用少甦大工竣陞光祿少卿歷官右僉

都御史撫治鄖陽疏言鄖陽孤懸萬山地連四省先朝設都御史止用撫治軍民耳目未一趨向靡定大盜窺伺勦撲後期卒至釀成大患甚非除戎器以戒不虞之意願假臣提督給以旗牌俾得專意軍務上報可鄖陽之加提督軍務自秉仁始致仕歸別墅有翔雲閣漣漪亭遊息其中絕意于進撫按文章薦凡二十上竟不召家食二十五年與三弟渝怡疊斑爛起舞稱壽二尊人歲時驩甚已二尊人相繼捐館亦以哭泣踰禮卒

陳 珊

陳珊字鳴仲其先廬陵人附籍銅仁舉嘉靖庚子貴州鄉試第二癸丑成進士授行人以忤分宜故官齧齧不達終兗州府同知嘗銘其座右曰士大夫能以居鄉之心居官必無寃民能以居官之心居鄉必無請託人以爲名言子揚產吳產周產皆鄉舉揚產舉萬曆甲戌進士黔中父子進士止珊與普安蔣氏清平李氏普定梅氏四家云

孫應鰲

孫應鰲字山甫清平衛人生之日適衛人饋六鯉因以名就塾受業日誦數千言正襟危坐求解大義年

十九以儒士應鄉試督學徐公樾一見大奇之許必  
解額放榜果以禮經中第一人癸丑成進士選庶吉  
士改戶科給事中出補江西僉事流賊起悍禦有法  
一道晏然九江三百人誤坐賊黨一言出之未幾遷  
陝西提學副使實意作人身先爲範在秦所取士悉  
一時名碩遷四川右叅政土酋薛兆乾執叅將賀慶  
以叛都御史谷公問計鰲曰叅將與天子孰輕昔

英宗北狩于愍肅公數語國威益振卒返 英廟今  
者豈恤一叅將邪谷從其議擒兆乾慶竟免於害隆  
慶改元陞僉都御史巡撫鄖陽因境內災疏請勤學

勵政親賢遠奸等十事 上嘉納之太和提督巨璫  
侮憲蠹民乃劾其欺悖悍險貪謬狀 上爲斥逐既

懇疏乞骸骨歸萬曆初起撫鄖陽首疏加銜提督  
軍務建文死事諸臣人皆諱未敢言鰲推衍詔書德  
意慷慨言之疏奏留中舉朝目爲昌言甲戌入爲大  
理卿丁丑陞戶部右侍郎改禮部掌國子監祭酒事  
在監雅意持風化造人才倣呂公柟遺意以舉人率  
多回籍自便以入監卒業爲耻不知當其在籍師儒  
之訓弗及憲臣之令弗加閭黨矜其資望有司遇之  
隆重身靡所檢而易蕩及入官材質已壞莫可如何

矣宜徵天下舉人悉入監 祖宗設太學非舉貢非  
勲胄恩廕不入祭酒司業爲朝廷作人於內提學爲  
朝廷作人於外必在內樹風教而後在外振紀綱今  
提學所擯斥者盡歸之太學倒置若此則太學母乃  
爲提學藏垢匿瑕之所爲生員不才者之逋逃藪與  
甚且至愚不肖貲貨一入咸廁其中太學之汙穢極  
矣疏上俱著爲令丙子八月駕幸太學鰲舉虞書無  
教逸欲有邦進講 上嘉納命坐賜茶蓋曠典云以  
病予告築學孔精舍於西城之陽起刑部右侍郎尋  
陞南工部尚書卒賜祭葬萬曆壬寅賜謚文恭所著

有易談四書近語教秦語錄雍諭彙稿續稿春秋節要律呂分解等集傳於世

馬廷錫

馬廷錫字朝寵宣慰司人初仕內江令二載卽解組歸師事朗州蔣道林講學於桃岡精舍數年始歸與孫淮海諸公聚講越山又於漁磯構棲雲亭趺坐其上餘年有悠然自得之趣嘗著動靜解曰萬卷之聰明枝葉一塵不染可窺心性本根又著白抱守初心周旋世務精誠必貫乎金石乎神明必極精極清以至於極定始長覺

長明以至於長存徹頭方了道赤手莫言貧其勵志  
如此嘉靖三十六年巡按御史金谿王公紹元薦之  
於朝疏入不報四方士益尊仰之督學萬公士和請  
入書院爲諸生師其所著有漁磯集警愚錄沒祀鄉  
賢

### 柳之文

柳之文普安衛人有勇略官至守備嘉靖二十七年  
銅苗弗靖撫按檄領兵討賊賊卒至衆皆驚潰文仗  
劖曰彼獨非命何乃畏之舉有先逃者斬後賊大至  
文手刃數賊後無援兵竟亡於陣未幾賊首龍許保

就擒鞠之賊曰石參將不要錢柳守備不怕死吾是以就擒耳總督撫按議於銅仁立祠祀之

### 石邦憲

石邦憲字希尹清平衛人方在娠庭前有千葉榴結實甫十歲苗夷迫城憲于階下立壘持標願當一隊識者壯之嘉靖七年襲衛指揮使九年都清守備時四川流賊合思石苗民據江村圍叛會大征命下憲視其巖壁高僅三丈令軍士積草崖下軍中選一少年何全謬充千戶與賊交質給曰招撫全往探賊食盡守者皆婦人卽從岡上一躍下大軍鼓譟急攻斬

首百餘級磨子崖固苗盧阿項等反撫之不服調漢  
土兵進征春江雨漲憲令軍士編筏徑渡猝至崖下  
夜防刦營是夜果至伏兵斬首數十級鎧仗盡棄賊  
求援于播州諸將皆恐憲曰安萬全楊烈所畏也調  
水西兵三萬進次烏江聲問烈罪烈奚暇援人復每  
路分兵迭肄以疲賊時二月沿路桃花乃集兵犒  
勞曰吾以鼓催桃花花速開固卽破矣是日午報桃  
花盡開又令樹旗百步外曰我射中旗竿賊父子俱  
擒一發果中軍中踊躍乘風舉火焰彌天斬關而  
登生擒賊父子斬首無算二十九年銅仁劇賊龍許

保吳黑苗等據六龍山爲穴日事剽掠進攻銅仁等府楊叅將以招撫被擒撫堂以進攻逮繫三省震恐當事者乃議設總制于是張公岳開府沅州憲見督府曰興師十萬日費千金某謂以夷攻夷者便以一日費而撫其順者爲腹心以一日費而賞其順者以誅叛不一年而賊可平賊逼銅之南岸憲率兵往援諸苗驚謂曰石老虎來也不敢復窺銅仁乃由間道襲破思州陷石阡府憲領兵進勦大破之龍塘追之董苗山斬賊千餘賊勢日蹙於是捐厚幣招吳來格等內附已而許保擒黑苗授首數十年賊黨始滅陞

都督府僉事鎮守貴州鶻勦六龍山殘苗悉平遷右都督特進榮祿大夫前後蒙欽賞者十四陞俸級者三廕二子隆慶三年卒賜葬祭贈左都督

李 梅

李梅字元年貴州前衛人爲諸生累試高等三十年竟不偶會從孫蒙亨舉於鄉遂謝學官曰李氏讀書今有種矣何必乃公杖策偕蒙亨至燕道出桃源蒙亨方就婚令舍令以父行事之掃除外舍舍人暮夜引百金爲壽叱去之絕口辭其事令廉知之大嘆服伯兄官大寧諭卒梅奔赴迎櫬歸中流舟覆身翼襯

淳木上誓與遺骨俱葬江魚已救至得免若神相之  
者業師家病疫死喪相尋同舍咸避去梅曰死生有  
命在三之義寧能恝然躬醫藥調護之卒亦無恙以  
子時華貴封重慶推官沒祀鄉賢萬曆辛丑單恩贈  
御史

陳尚象

陳尚象字見義貴州都勻衛籍登萬曆庚辰進士癸  
未授中書舍人戊子選戶科給事中屢彈白簡卓有  
風裁給假送母還丁王母喪庚寅復除本科辛卯主  
考四川陞刑科右壬辰建言忤 上旨賜玦卒于家

楊如臯

楊如臯號師虞貴州銅仁人弱冠登萬曆甲辰進士授玉田縣令調停養馬之法最有方略地方稱便奴酋入貢經其邑需索不貲從中多所斡旋邑民持以無恐遷入雲南道御史中立不倚論列悉關大計一時正人君子藉以爲重未究所施而卒卒之日僅三十歲耳

吳 錠

吳錠都勻人幼孤鞠於伯氏嘉善初從桐城歸尚未知<sub>1</sub>時鄒公爾瞻謫勣得錠卷擊節曰此黔第一士

之邑督學李公學一馮公時可後先教令士  
伍首鋌萬曆壬午舉鄉試不一鄒公時易以正字鋌  
默默領之不吐一語鄒公去勻鋌益下帷自砥礪聖  
學有圖日課有紀至經手自抄寫勻上多從之遊鋌  
亦歎然以師道自任夜潛坐常牽鷄鳴讀書聲朗朗  
徹曉思及父母早塗淚沾沾下坐是多病連上春官  
不偶竟卒貧亡以爲殮同年侍御李公時華助之歸

許 鐏

許鐏字國器貴州石屏人進士知嘉善蒞任務崇節  
省訪民疾苦有耆老董申留心世故洞悉江南利弊

畫均徭均平等數事磁得而奇之上按龐公力請  
從其議龐卽具奏立條鞭法著爲令甲考績至京拜  
御史官終僉事